

Ümmetrecken

Vör gaut dree Wäken bün ik maol wär ümmetrocken. Ditmaol van Vechte naoh Damme. Kerl, wat was dat wär een Speктаakel. Kissen packen, aalt ut Schapp haolen, wat daor in de lessden säwen Jaohre tauhope kaomen is. Dat kann man sik manges nich vörstelln, wat daor aals tauhope kump. Man, dann see mi een Nönnken tau: twee Drittel kanns du wächschmieten, un wat du siet een Jaohr nich mehr brukt häs, dat kanns du uk man wäch daun. Dän Raot hebb ik mi tau Harte naohmen. Un dann güng dat daorbi. Den Müllemmer deher un rut daormit. Dat, wat ik wächschmäten hebb, dat wör buld wüklich mehr, as dat, wat ik mitnaohmen hebb. Jao man tau: Villichte wör dat doch nich ganz so leip, aower, dat Nönnken har woll Recht: Daor köm wüklich masse Untüch tauhope, wat ik wüklich siet Jaohre nich mehr brukt har un wüklich wäch kunn. Masse ünnütz Warks.

Eenfach wör dat wisse nich. Bi väle Soaken hebb ik faoken noch dacht: Villichte kanns dat ja doch noch maol bruken.

Jao, daor hört masse Maut tau, sik wüklich to öwerwinnen un den Kraom dann uk weg tau daun.

Van Daoge bün ik nu all siet dree Wäken in miene neeie Heimat Damme un mottt seggen: Mi fählt dat aals gor nich. Ik kann daor gaut ohne tau mit läwen un bün heller froh, dat ik mi öwerwunnen hebb, dat waogt tau hebben, maol wüklich aals schier un raine tau maoken.

Ik glöve in use Läwen kummp naoh väle Jaohrn uk manges unnütz Tüch un Warks tauhope. Väles, van dat, wat wi mit us rümmedräget, brukt wi nich. Väles van dat, wat ik meen, dat bruk ik vör een taufrär Läwen, kann villichte uk wächschmäten wärn. Af un tau helpt us dat villichte, uk in use Läwen maol Schierigkeit tau maoken.

Is faoken nich ganz lichte, weil ik meen, ik bruk dat, kann dat nie nich missen. Man, is dat wüklich so?

Man brukt dor Maut tau, sien Läwen gaut un ehrlik antaukieken un intausehn: dat bruk ik nich, daor kann ik gaut aohne tau in mien Läwen.

Aower ik bün daor faste van övertügt. Wenn wi den Maut man hebbt, lostaulaoten, dann läwt et sik naossens bäter un lichter.

Also: Hebb Maut! Kiek dor maol genawe hen, wat du wükelk bruukest.